

2024

Loahpparaporta

Ohcejoga turismma Master Plan -projeakta

1.9.2023 – 31.8.2024



LAPIN LIITTO

Sisdoallu

Referáhtta.....	1
Projeavtta ollašuhttin.....	2
Bušeahtta.....	3
Vuorrováikkuhus ja oasálašvuohta	3
Projeavtta bohtosat	4
Ohcejoga turismma dálá dilli.....	5
Heajos bealit ja áitagat	6
Nanusvuodát ja ovddidanpotentiála.....	7
Ulbmilat jahkái 2035	8
Joatkkadoaimmat.....	10
Čoahkkáigeassu	12

Referáhtta

Ohcejoga turismma Master Plan -projeakta álggahuvvui vástádussan guovllu deaividan mearkkašahtti nuppástusaide, nugo Atlántta luosa guolástangildosa ja koronapandemiija dagahan ekonomalaš hástalusaid. Ohcejoga gielda ohcalii giđđat 2021 Fáhkkes ráhkadusnuppástusa (ÄRM) gielddan. Jagis 2023 beaiváduvvui gielldastrategiija, mas suvdilit lassáneaddji turisma válljejuvvui oktan strategalaš váldosuorgin. Strategiija vuodul Ohcejoga gielda ozai Ohcejoga Turismma Master Plan -projeavtta, mii ollašuhtto Lappi lihtu AKKE-ruhtademiin (Guovlluid suvdilis ovdáneami ja eallinfámu doarjuma projeaktaruhtadeapmi). Projeakta álggii 1.9.2023 ja nogai 31.8.2024.

Projeavtta ulbmilin lei láchit Ohcejoga turismma ovddideapmái oppalaš ja áddehahtti plána, mii vuodđuduvvá dihtui ja oasálašvuhtii. Ulbmiliidda gulle maid figgamušaid meroštallan, mearrádusaid ja joatkkadoaimmaid čielggasmahttin, sihke Ohcejoga turismma brándi čielggasmahttin ja dan mielde dahkkon buvttaovdáneami ovddideapmi. Guhkes áigodaga ulbmilin lea lasihit Ohcejoga turismma suvdilit ja čehpet, láchit ođđa bargosajiid, buoridit fitnodagaid gilvonávcca ja gánnáhahttivuodá, sihke lasihit gieldda vearroboaduid turismma ovdáneami bokte.

Projeavtta ollašuhttin vuodđuduvai nana vuorrováikkuhussii ja oasálašvuhtii. Projeavtta áigge ordnejuvvojedje moanat bargobájit ja seminárat, maidda oassálaste viidát čanusjoavkkut, nugo turismafitnodatdoallit, gieldda bargit, luohtámušolbmot ja báikkálaš ássit. Dilálašvuodaid lassin jearahalle persovnnalaččat moanaid doaibmiid, mielde maiddá turisma- ja eará fitnodatdoallit, gieldda bargit ja áššedovdit. Dáid vuorrováikkuhussii vuodđuduvvi dilálašvuodaid bokte šattai viiddes govva Ohcejoga turismma dálá dilis ja ovddidanpotentiálas.

Projeavtta áigge gávnnavvojedje Ohcejoga turismma guovddáš nanusvuodát, heajos bealit, vejolašvuodát ja áitagat. Nanusvuodaide gullet earet eará áidnalunddot vuovdinovddut - nugo guovssahasat, meahcceguovllut ja eallinfámolaš sámekultuvra - mat leat erenomáš beroštahti riikkaidgaskasaš márkaniin. Heajos bealit leat earet eará seangabáikkiid vuollegis geavahandási, turistaid oanehis orrunáigi ja dálveaktivitehtaid váili. Vejolašvuodaid fáallet riikkaidgaskasaš turismma lassáneapmi ja Lappi brándi nanusvuohka, go fas áittan oidnet turismma ovddideami iešguðetlágan hástalusaid ja gilvvu eará turistabáikkiiguin.

Projeavtta boadusin šattai viiddes turismma Master Plan, mii sisttisdoallá konkrehtalaš doaibmabidjoevttohusaid turismma ovddideami várás Ohcejogas. Ávžžuhussan evttohuvvojedje earet eará geinnodagaid ja turistabáikkiid ovddideapmi, vuovdaleapmi ja vuovdima beavttálmahttin, oktasašbarggu nannen sierra čanusjoavkkuid gaskkas, sihke turismaáššedovdi bálkáheapmi. Lassin deattuhuvvui oktasašbarggu mearkkašupmi Norggain, mii fállá vejolašvuodaid rájáid rasttildeaddji turismapakehtaid ovddideapmái.

Ohcejoga turismma Master Plan -projeakta láchá nana vuodu Ohcejoga turismma suvdilis ja birrajagi ovddideapmái. Projeakta olahii dan ulbmila láchit čielga plána sierra muttuiguin, mii doarju Ohcejoga turismma ovdáneami ja guhkit áigegaskkas buorida guovllu ekonomalaš dili.

Projeavtta ollašuhttin

Projeakta álggii čakčat 2023, go Ohcejoga gieldda oáččui Lappi lihtus mieđis mearrádusa AKKE-ruhtadeamis. Projeavtta ulbmilin lei láchit Ohcejoga turismma ovddideapmái oppalaš ja áddehahti plána, mii vuodđuduvvá dihtui ja viiddes oasálašvuhtii. Ohcejoga turismma Master Plan stivre turismma suvdilis ovddideami guhkes áigegaskkas. Joatkkadoaimmaid plánemis váldojuvvojedje vuhtii sihke báikkálaš fitnodatdoalliid ja eará guovddáš doaibmiid oainnut. Projeakta nogai 31.8.2024.

Projeavtta ollašuhttimis vástidii oastobálvalussan Kiila Consulting Oy, ja projektahoavdan Ohcejoga gielddas doaimmai Taru Lindell 20 % bargoáiggiin.

Projeavtta áigge buvttaduvvui ollu materiála, mii sisttisdoalai ee. doaibmabirrasa gilvonákcaanalysa, turismma treanddaid, ulbmiliid meroštallama, potentiála govvádusa, brándibuktagiid ja -pakehtaid ovdamearkkaid, guovlluid geavaheami plánema, doaibmabidjoevttohusaid ja oktasašbargomáliid govvádusa. Buvttaduvvon materiálad vuodul Kiila Consulting gárvvistii viiddes bargoraportta.

Dát loahpparaportta lea referáhtta Kiila Consulting gárvvistan bargoraporttas. Bargoraportta sisdoalu refereremis lea geavahuvvon ávkin koanstajerbmi. Loahpparaportta editeren ja dieđuid dárkkisteapmi lea goit ollašuhtton olbmo dahkan bargun, vai riektavuoda lea sáhtán sihkkarastit.

Bušeahhta

Projektii juolluduvvui ruhtadeapmi Lappi lihtu Guovlluid suvdilis ovdáneami ja eallinfámu doarjun (AKKE) -mearreruđas (mom. 32.30.40) riikkaidgaskasaš kriisaruhtadeapmái. Doarjja juolluduvvui 80 % dohkkehuvvon oppalašgoluin, mat ledje 67 976 €. Doarjaga ossodat lei nappo 54 381 € ja gieldda iešruhtadanoassi 13 595 €.

Vuorrováikkuhus ja oasálašvuohta

Projeavtta guovddáš ulbmilin ásahuvvojedje ulbmiliid meroštallan turismma ovddideapmái ja turismastrategalaš dási mearrádusdahkan. Oasálašvuohta ja vuorrováikkuhus ollašuttuuvvui mánggabealagit sierra čanusjoavkkuiguin. Projeavtta áigge ordnejuvvojedje moanat bargobájit ja seminárat, main giedahallojedje turismma dálá dilli, gilvonákca, áidnalunddot vuovdinovddut ja boahttevuođa višuvnnat. Dáidda dilálašvuođaide oassálaste viidát čanusjoavkkut, ja daid vehkiin fitnašuvai viiddes govva Ohcejoga turismma dálá dilis ja ovddidanpotentiálas.

Jearahallamat: Čakčamánu 2023 ja miessemánu 2024 gaskkas jearahalle 64 doaibmi, mielde ledje 27 turismafitnodatdoalli, 9 gieldda luohttámušolbmo, 7 gieldda bargi, 2 visit-organisašuvnna ovddasteaddji, 3 bođugávppi eaiggáda, 2 Deanu guolledoalloguovllu doaibmi, 2 guollebivddu áššedovdi, 1 guovllu historjjá ja kultuvrra áššedovdi, 2 Meahcceráđđehusa bargi, 7 mátkeordnejeaddji, 1 gielddahoavda ja 1 johtolathárjeheaddji.

Kick-off váldostivraseminára 14.12.2023: Dilálašvuođas manne čađa Ohcejoga turismma dálá dili, turismma ovdáneami váldoprinsihpaid, buriid ovdamearkkaid eará turistabáikkiin, eanageavaheami doaibmanvugiid sihke gieldda rolla turismma ovddideamis. Dilálašvuođas ledje 12 oasseváldi.

Kommenterenbargobádji fitnodatdoalliide 11.4.2024: Dilálašvuođas ovdanbukte dálá dili ja gilvonávcca analysa sihke áidnalunddot vuovdinovdduid. Fitnodatdoallit adde bohtosiidda guoski kommeanttaid, ja materiála rievdaduvvui kommeanttaid vuodul.

Vuovdinovdo- ja temábargobájit: Dáid bargobájiid ordnejedje giđa ja geasi 2024 áigge moanaid sierra temáiguin, nugo dálvi, garra dálkkádat- dahje eará dilit, almmi albmoneamit, báikkálaš kultuvra ja sápmelašvuohta, čázadagat ja guollebivdu, meahcceguovllut sihke eanageavaheapmi ja geinnodagat. Temábargobájiin ledje oktiibuot badjel 100 oasseváldi.

Višuvdnabargobájit ja mearrádusdahkan: Dáin bargobájiin giedahalle Ohcejoga turismma višuvnna jahkái 2035. Bargobájiide oassálaste fitnodatdoallit, váldostivrra áirasat ja gieldda ovddasteaddjit.

Joatkkadoaimmaid Giedahallan: Fitnodatdoallit mearridedje joatkkadoaimmaid birra ja dat giedahallojedje teknikalaš ja buresveadjinlávdegottis, gielddaráđđehusas ja gieldda váldostivrras. Dáid čoahkkimiid bokte sihkkarastuuvvui, ahte projeavtta bohtosiid ja ávžžuhusaid sáhtta heivehit geavadii.

Stivrenjoavku: Stivrenjovkui gulle ovddasteaddjit Meahcceráđđehusas, báikkálaš turismafitnodagain, Báišduoddara ja Gálddoavvi bálgosiin, Eallinfápmo- ja teknikálaš lávdegottis, sihke muhtun Ohcejoga gieldda virgeolbmot. Sámedikkis bivde oasseváldi stivrenjovkui, muhto ovddasteaddji ii fitnašuvvan. Stivrenjoavkku čoahkkimiin gieđahalle projeavtta ovdáneami, ulbmiliid ja doaibmajuvvuid. Stivrenjoavku čoahkkanii projeavtta áigge golbmii.

Eará čoahkkimat ja Oktasašbargu: Projeavtta áigge ordnejuvvojedje maid eará čoahkkimat ja oktasašbargodeaivvadeami, nugo projeavtta álggahanráđđádallan ruhtadeaddjiin, Master Plan -barggu ovdanbuktin eanapolitiikálaš bargojovkui, plánavuloš luossaguovddášii laktáseaddji turismafarspektiivvat ja potentiála, rájá rasttildeaddji oktasašbarggu ovddideaddji Crossborder Business LAB Buodggáin, sihke oktasaš ráđđádallamat Ohcejoga gieldda Teno Outdoor -projeavttain. Lassin konsulta ja dinggojeaddji gaskasaš čoahkkimat ja ságastallamat čađahuvvojedje vahkkošat.

Sámediggi: Projeavtta materiála doaimmahuvvui Sámediggái cealkámuša várás borgemánus 2024, mii sihkkarasttii, ahte sámediggi ja dan sierraiešvuođat váldojedje vuhtii projeavtta ollašuhttimis, bohtosiin ja doaibmajuvvuohtohusain.

Projeavtta bohtosat

Projeavtta áigge dahkkojuvvui viiddes analysa turismma dálá dilis ja ovddidanpotentiálas, gávnahuvvojedje guovddáš nanusvuođat ja headjuvuođat, gárvvistuvvojedje konkrehtalaš doaibmajuvvuohtohusat ja čielggasmahttojuvvui Ohcejoga turismma brándi. Dasa lassin projeavtta áigge ollašuhtton viiddes vuorrováikkus sierra čanusjoavkkuiguin sihkkarasttii, ahte buot guovddáš doaibmit ledje mielde projeavtta ollašuhttimis ja mearrádusaid dahkamis. Dát bohtosat láchčat mávssolaš prinsihpaid boahhtevuhtii ja veahkehit ovddidit suvdilis ja birrajagi turismma, mii doarju báikkálaš ekonomii ja barggolašvuođa. Projeakta olahii dan ulbmila láchčat čielga plána sierra muttuiguin Ohcejoga turismma ovddideapmái.

Projeavtta ávkkiid sáhtta juohkit oanehis ja guhkes áigegaskka ávkkiide.

Oanehis áigegaskka ávkkit:

- Buoret áddejumi Ohcejoga turismma dálá dilis ja ovddidanpotentiálas.
- Konkrehtalaš doaibmajuvvuohtohusat turismma ovddideami várás.

Guhkes áigegaskka ávkkit:

- Ohcejoga turismma brándi čielggasmahttin ja guovllu dovddusvuođa lasiheapmi.
- Suvdilis turismma ovddideapmi birra jagi doaibman doarju báikkálaš ekonomii ja barggolašvuođa.

Ohcejoga turismma dálá dilli

Ohcejoga turisma lea čielgasit maŋábealde eará Lappi turismma ovdáneami ektui. Dát boahtá ovdan erenomážit idjadanmeriin ja searjagabáikkiid geavahandásis, vuollegis riikkaidgaskasašvuodadássin ja oanehis orrunáigin.

Jagis 2023 Ohcejogas registrerejuvvojedje sullii 30 000 idjadeami, mearri lea bisson seamma dásis maŋimuš 30 jagi. Koronapandemiija lasihii oanehis áigái ruovttueatnama turismma, go jagis 2021 registrerejuvvojedje olahuslaš 32 000 idjadeami. Liikká Ohcejoga turismma riikkaidgaskasašvuodadássin lea bisson vuollegassan, ja stuorámuš oassi turisttain leat suomelaččat. Riikkaidgaskasaš turisttat bohtet lagamustá Hollánddas, Duiskkas ja Norggas, muhto sin ossodat lea mearkkašahtti ollu uhcit go eará sajiin Lappi guovllus.

Idjadansadjekapasitehta geavahandássin lea mearkkašahtti ollu vuollegut go eará sajiin Lappi guovllus. Dušše uhca oassi idjadansadjekapasitehtas lea vuovdinláhkaai stuorra digitála vuovdinkanálain, mii váttásmahtá áššehasaid háhkama. Idjadansadjebálvalusaid árvvoštallamat leat goit gaskameari mielde buorit, mii čujuha dasa, ahte bálvalusaid kvalitehta lea buorre, muhto daid vuovdaleapmi ii leat nu beaktit.

Guovddáš váttisvuhta lea dat, ahte turisttat orustit nu oanehis áigge Ohcejogas. Ohcejohka oidnojuvvo nappo čađajohtinbáikin. Dát geahpeda guovllu turismaboađuidda, dasgo oatnelanbotta finademiid áigge turisttat eai geavat mearkkašahtti ollu ruđa aktivitehtaide dahje lassebálvalusaide.

Ohcejogas leat dál dušše sullii 25 aktiivvalaš turismafitnodaga, geat ordnejit turismabálvalusaid. Fitnodagat leat eanaš smávva, ja daid doaibma molsašudda ollu sesonjaid mielde, mii čuohtá maid báikkálaš olbmuid bargosajiid mearrái turismasuorggis dálveáigge.

Geasseturisma

- Badjel 70 % Ohcejoga idjademiin lea geasse-čakčamánu áigge, nu ahte geasseáigodagas turisttat leat sakka eanet go eará áigge.
- Geasseáigge 80 % turisttain leat suomelaččat, ja riikkaidgaskasaš turisttaid ossodat lea uhcán.
- Guollebivdoturisma lei ovdal mearkkašahtti ealáhus, muhto Atlántta luosa guolástanráddjehusaid geažil mánggat dasa laktáseaddji turismafitnodagat leat heitán doaimmaset.
- Ohcejoga geasseturisma dovddus geasuheaddji dahkkiiguin ii ávkkástallo nu mo sáhtášii. Mánggat turisttat vánddardit mielas, muhto dan váikkuhus guovllu boađuide lea dán rádjai leamaš uhcán, dasgo vánddardeaddjit golahit eanaš dušše borramušdárbašiid.
- Ohcejoga turisma oidnojuvvo čađajohtinbáikin, ja gaskamearalaš orrunáigi lea dušše 1,6 jándora, mii geahpeda turismaboađuidda.

Dálveturisma

- Dálveturisma lea báhcán čielgasit geahpibun eará Lappi dálveturistabáikkiid ektui, main dat lea mearkkašahtti dienasgáldu.

- Dálveáigge riikkaidgaskasaš turisttaid ossodat loktana 63 %:ii, muhto mearri ii leat lassánan mearkkašahtti ollu jagi 2012 maŋŋá.
- Dálveturismma ovdáneami hehte dat, ahte dálveáigge leat nu uhcán idjadansadjefitnodagat rabas. Dálveaktivitehtat ja geinnodagat eai leat maddái doarvái. Lassin bálvalusaid vuovdaleapmi lea heajos dásis.
- Lanjaid geavahandássi dálveáigge lea dušše sullii 25 %, ja searjagabáikkiid geavahandássi 12 %, mii lea sakka vuollegut go eará sajiin Lappi guovllus.
- Dálvebaji fáldat báhcá guhkás eará Lappi turistabáikkiid dásis, ja turismabálvalusaid ordnejit lagamustá smávva doaibmit.

Heajos bealit ja áitagat

Ohcejohka lea báhcán čielgasit maŋábeallái Lappi turismma ovdáneami ektui, ja guovllu dovddusvuohta turistabáikin lea vuollegis. Dát lea váikkuhan turistarávnnjiid mearrái ja turismaboađuide. Ohcejohka ii leat vel nu dovddus turistabáiki ja lea báhcán heajut sajádahkii vuovdalanorganisašuvnnaid hierarkiijas. Dálá vuovdalandoaibmajut eai bálval fitnodagaid doarvái.

Dálveturismma ovddideamis aktivitehtain lea hui mearkkašahtti rolla. Go eai leat doarvái dálveaktivitehtat ja -geinnodagat, de lea veadjemeahttun ovddidit dálveturismma ja dat lea stuorámuš eastta turismma lassáneapmái.

Ohcejohka oidnojuvvo čađajohtinbáikin, gos turisttat orustit dušše oanehaččat earet dálveáigge. Dát lea váikkuhan turismaboađuide ja fitnodagaid gánnáhahttivuhtii. Dákkár turismma hástalus lea das, ahte áššehassii laktáseaddji golut (erenomážit čorgen) loktanit allagin ja lea váttis buoridit gánnáhahttivuođa. Meattájohtti áššehasat eai maid seamma ollu guođe boaduid aktivitehtain dahje eará lassebálvalusain.

Ohcejoga turisma molsašuddá ollu sesonjaid mielde: 70 % áššehasain boahotá geasse-čakčamánuš. Dát dahká fitnodagaid doaibmamis hástaleaddji ja gieldda vearroboađut eai sáhte lassánit. Dálveturismmas lei čielga lasáhus jagis 2012, man maŋŋá áššehasmearit leat bisson sullii seamma dásis.

Ohcejoga turismma ráhkadusat váilot measta ollásit ja organiserendássi lea vuollegaš. Turistabáikki mánggat vuodđoáššit, nugo geinnodagat, prográmmabálvalusat, fitnanbáikkid, vuovdin- ja vuovdalankanálat, joatkkaoktavuođaid joavkohtolat girdinstašuvnnain, guovlovuovdaleapmi ja rabasáiggiid koordineren, leat báhcán dagakeahtta. Dušše unna oasáš Ohcejoga idjadansadjefitnodagain vuovdá iežas buktagiid almmolaš vuovdinkanálain ja dušše smávva oassi searjagabáikkiin lea geavaheamis Lappi dálvesesonja áigge.

Ohcejoga turismma hástalusaid ádden lea dehálaš, vai sáhtta ovddidit beaktilis čovdosiid ja garvit seammassullasaš váttisvuodaid boahhtevuođas. Ohcejoga turismma ovddideamis lea dehálaš vuodjut álggos vuodđoáššiid dikšumii, nugo geinnodagaid ja aktivitehtaid ovddideapmái, vuovdaleami ja vuovdima beavttálmahttimii sihke oktasašbarggu nannemii sierra čanusjoavkkuid gaskkas.

Nanusvuodát ja ovddidanpotentiála

Ohcejogas leat mánggat nanusvuodát, mat addet vuodu turismma mearkkašahtti ovdáneapmái. Lappi lea máilmmiviidosáččat dovddus turismabrándi, ja Ohcejohka sáhtta ávkástallat dáiinna dovddusvuodain. Ohcejohka lea oassi Lappi-brándi, muhto fállá mánggaid earáid Lappi turistabáikkiid ektui eaktidut vásáhusaid, mat eai leat nu olu hábmejuvvon gávpebuvttan. Dat lea beroštahtti erenomážit daidda turisttaide, geat ohcet eakti vásáhusaid ja autentalašvuoda.

Ohcejoga áidnalunddot duovdagat, árttalaš meahcceguovlu ja ealli sámekultuvra geasuhit dakkár turisttaid, geat atnet árvvus ráfi ja eaktivuoda. Ohcejohka earrána Lappi mássaturistabáikkiin. Turisma lea seilon Ohcejogas smávvalágan hámis ja báikkálažžan, ja barttain orrun lea guovllus buorre dásis. Koronapandemiija geažil orrumat barttain leat lassánan erenomážit riikkaidgaskasaš turisttaid ja mátkoordnejeaddjiid gaskavuodas, mii láchá vejolašvuodaid ovdáneapmái. Erenomážit luksusbarttat leat šaddan bivnnuhin riikkaidgaskasaš turismmas.

Vaikko dálá dilis leat hástalusat, de lea Ohcejogas mearkkašahtti ovddidanpotentiála erenomážit birrajagi turismma lasiheamis. Dálá dili ektui guovllus leat ollu ovdánavjolašvuodát, mat vuodđuduvvet sihke idjadansadjekapasitehta ja bálvalusaid ovddideapmái ja mánggabealagin dahkamii. Ovdamearkka dihte jos dálá seangakapasitehta geavahandási lihcostuvašii loktet 70 %:ii, turismaidjademiid mearri šattašii njealjegeardásažžan. Dát oaivvilda, ahte infrastruktuvra lea juo gárvvisin, muhto dan beaktilis geavaheapmi ja vuovdinkanálaid ovddideapmi leat guovddáš sajis turismaboađuid lasiheamis. Seangakapasitehta ja bálvalusaid buorideapmi sáhtášii maid hohkahit buorebut máksi áššehasaid, mii veahkehivččii láchit suvdilis ovdáneami turismaealáhussii. Lassin digitaliserema ja vásttolašvuodasertifikahtaid viidasut ávkinatnin sáhtášii buoridit Ohcejoga gilvonávcca riikkaidgaskasaččat

Birrajaagi turisma lea nubbi guovddáš ovddidanpotentiála. Vaikko Ohcejohka lea dál nannosit geasseturismabáiki, dan birrajagi turismabálvalusaid ovddideapmi sáhtášii lasihit turismaboađuid mearkkašahtti ollu. Dálveturisma oidnojuvvoge stuorra vejolašvuotán, man ovddideapmi sáhtášii buktit guvlui erenomážit riikkaidgaskasaš turisttaid. Dát gáibidivččii earet eará turismainfrastrukturra ovddideami dálvebadjái sihke investeremiid prográmmabálvalusaide, nugo oahpistuvvon luonddutuvrraide, gielkávuodjimii ja sámekultuvrra ovdanbuktimii. Gáiddusbargamii laktáseaddji bálvalusaid ja sadječovdosiid sáhtášii ovddidit, mii hohkahalašii turisttaid, geat ovttaštit barggu ja luomu doallama. Ohcejogas leat erenomáš buorit vejolašvuodát ovddidit dálveturismma, dasgo guovllu luondu fállá fiinna vejolašvuodaid earet eará guovssahasaid geahčadeapmái, skápma vásiheapmái ja meahci ráfái.

Ohcejohka sáhtta čalmmustahttit iežas turismamárkaniin maid nana kultuvrralaš fálddagain, erenomážit suvdilis ja vásttolaš turismma dáfus. Ohcejogas juo doaibmá Saamelaismatkailu- ja yrittäjät ry, mii sáhtášii boahhtevuodas doarjut guovllu fitnodagaid sámekultuvrii vuodđuduvvi turismabuktagiid ja -bálvalusaid ovddideamis. Suvdilis turismma treanda lea lassáneamen mearkkašahtti ollu, ja Ohcejohka sáhtášii čalmmustahttit iežas vásttolaš turismma mállegieldan, mii nannešii dan sajádaga riikkaidgaskasaččat.

Turismainvesteremiid hohkahallan, nugo kvalitehta dáfus buoret idjadansadjebáikkiid huksen ja bálvalusfálaldaga viiddideapmi, sáhtášii leat okta guovddáš lávki turismma lasiheamis. Seammás go guovllu idjadansadje- ja bálvalusráhkadus buoriduvvo, lea dehálaš ovddidit vuovdima digitála kanálain, vai Ohcejohka livččii buorebut olaheamis riikkaidgaskasaš áššehasaide. Girkonjárgga girdinstašuvvna vejolašvuodaiguin ávkkástallan livččii dehálaš olahtahtivuoda ja riikkaidgaskasaš turismma lasiheami dáfus.

Fierpmádatoktasašbargu turismafitnodagaid gaskkas sáhtášii buoridit fitnodagaid gánnáhahttivuoda ja beaktivilvuoda. Lassin oktasašbargu turismasuorggi sierra čanusjoavkkuiguin sihke rájáid rasttildeaddji oktasašbargu Norggain sáhtášedje buktit ođđa fitnodatdoaimbavejolašvuodaid erenomážit riekkesmátkkiid ordnemis ja buktagiid páhkkemis. Ovdamearkka dihte sihkkelastinturisma ja eará luonddus johtin Deanuleagi guovllus lea oassi ovddidanplánaid. Vaikko Atlántta luosa bivdin lea dán áigge ráddjejuvvon, luossa lea historjjálaččat geasuhan ollu turistaid Ohcejohkii. Guollebivdu sáhtta boahttevuođas ain leat guovddáš oassi turismabuktagiid, jos ovddidat ođđa, eará guollešlájaiguin ávkkástalli guollebivdobuktagiid ja -vásáhusaid. Dát aktivitehtat sáhttet buktit guvlui ođđalágan áššehasaide, geat leat beroštuvvan lihkadeamis ja eará aktiivvalaš doaimmain ja geaidda vásttolašvuhta lea dehálaš ášši.

Buohkanassii Ohcejoga turismmas lea mearkkašahti ovdánanpotentiála, jos dálveturismma, riikkaidgaskasašvuoda ja birrajagi doaimma lihkostuvvet ovddidit suvdilit ja čehpet. Dát gáibida resurssaid bidjama infrastruktuurii, vuovdaleapmái ja ođđa buktagiid ja bálvalusaid ovddideapmái. Go buorida digitála oinnolašvuoda ja ávkkástallá viidát digitála vuovdinvuodáiguin, sáhtta olahit buorebut riikkaidgaskasaš áššehasaide. Gilvonávcca seailluheami várás lea dehálaš bidjat resurssaid suvdilis turismii ja vásttolašvuhtii.

Ulbmilat jahkái 2035

Ohcejoga turismma ulbmilat jahkái 2035 mearriduvvojedje projeavttas ordnejuvvon višuvdnabargobájiid ja semináraid vuodul. Bargobájiide oassálaste aktiivvalaš turismafitnodatdoallit, gielddaáirasat ja eará čanusjoavkkut, mat/geat ovtas ságastalle turismma ovdánanvejolašvuodain ja boahttevuođa višuvnnas. Ságastallamiid ja bargobájiid bohtosat heivehuvvojedje konkrehtalaš ulbmilin, mat giddejit fuopmášumi erenomážit birrajagi turismma ovddideapmái, báikkálaš kultuvrra seailluheapmái ja gieldda vearroboaduid lasiheapmái. Ulbmiliid bidjamis váldojedje vuhtii sihke gieldda ja fitnodatdoalliid oainnut, ja dat dohkkehuvvojedje virggálaččat gieldda váldostivrras ja gielddaráđđehusas geassemánu 2024. Dáid numerálalaš ulbmiliid berre čuovvut: turismaboahu, bargosajit ja turismmas fitnašuvvi vearroboadut. Kvalitehtii guoski višuvnnas meroštallojit dat strategalaš prinsihpat ja árvoválljemat, maid mielde ovdáneapmi háliduvvo ollašuhttot.

Ulbmiliid olaheapmi gáibida turismainfrastruktuurra ovddideami, bálvalusaid buorideami ja riikkaidgaskasaš vuovdaleami beavttálmahttima.

Váldostivrra dohkkehan ulbmilat leat logahallon vulobealde.

Vearroboadut

- Turismma hálidit lassánit.
- Figgat dasa, ahte manjmuštá jagi 2035 turismmas fidnet jahkásaččat sullii miljovna euro vearroboaduid, mii oaivvilda sullii 1 000–2 000 ođđa seangabáikki, main ovttá fitnodaga sturrodat livččii sullii 200 seangabáikki dahje eanet. Dát logut sihkkarastet dan, ahte bargosajit šaddet doarvái, fitnodagat leat eanet gánnáhahttit ja dat mákset searvvušvearu.
- Smávit idjadan-, aktivitehta-, johtolat- ja lassebálvalusfitnodagat leat hui dehálaš oassi Ohcejoga turismma boahpteáiggi. Sin rollan lea ee. idjadandoaibma, aktivitehtafidnošeapmi, johtolatfidnošeapmi, sihke barggu addin fitnodatdoalliide, báikkálašvuoda ja autenttalašvuoda dorvvasteapmi ja dálá giddodatvuodu doarjun. Smávva fitnodagaid buvttadan vearroboadut eai goit leat doarvái guottáhallat gielda ekonomalaččat iehčanassan, go dat addet unnán barggu.
- Gielda doarju dálá fitnodagaid lassáneami sihke ovddida doaibmabirrása nu, ahte fitnodatdoaimma gánnáhahttivuoda lea álkit olahit.
- Dálá investeremiid álgui bidjan dahká vejolažžan investeremiid oažžuma boahptevuodas sihke EU-ruhtadeami geavaheami maiddái dás ovddos.
- Evttohus joatkkadoaibman: Čielggadat sierra doaibmasurggiid dálá ja potentiála vearroboaduid.

Lassáneami vuohki

- Turistameriid hálidit lasihit ovddidemiin erenomážit birrajagi doaimma ja guhkit orrunáiggiid.
- Bures máksi áššehasaid gávdonon lea hui dehálaš.
- Sámekultuvrra ja autenttalašvuoda hálidit seailluhit.

Vuovdaleapmi

- Ohcejoga oinnolašvuoda lasiheapmi ja guovllu vuovdaleapmi lea okta dehálamus joatkkadoaimmain.
- Hálidit geavahit brándinama Arctic Highlands, ovttastahtton Arctic Sky ja Arctic Waters/Ocean -brándinjunnošii.
- Jieknameara hálidit geavahit vuovdaleamis nu, ahte turistta movttiidahttet idjadit Ohcejogas ja dahkat beaivetuuvraid Norgga beallái. Dihto diliin sáhtá maid hukset riekkesmátkkiid ovtta norgalaččaiguin.
- Áššehasaid sáhtá doalvut sohppojuvvon meahcceguovlluide. Ohcejogas hálidit vuojulduvvat jođihuvvon aktivitehtaid ja pakehtaid vuovdimii.
- Huskybeatnagiid sáhtá geavahit vuovdaleamis nu, ahte mitaluvvo ahte dat lea Norgga beale aktivitehta. Huskybeatnagiid sáhtá manjelis buktit Ohcejohkii, jos turisma lassána ja gávdon oktasáš doaibmamálla. Miehtan beanaráidduin johtimii Ohcejoga guovllus máhcahuvvui lávdegoddái válmmaštallama vuollái, vuhtiiváldimiin sierra molssaeavtuid, mat laktásit doaimma ordnemii.
- Turismma eanageavaheamis sohppojuvvo ovtta Meahcceráđđehusain, gielddain, turismafitnodatdoalliiguin, bálgosiiguin, osolašgottiiguin sihke daid oassebeliiguin, geat/mat laktásit sierravuodot návddašanvuogitvuodaide.

Vuovdin

- Fitnodatdoallit váillahit ovttasbarggu riikkaidgaskasaš vuovdima ovddideamis erenomážit geasseturisma ektui, muhto maiddá čakča- ja dálvebuktaga vuovdimis.
- Fitnodatdoallit hálidit, ahte buvttá vuovdujuvvo mángga juohkinkanála bokte. Erenomážit sii hálidit prioriseret mátkoordnejeaddjigávppi sihke láhčit vejolašvuoda hukset pakeahthaoppalašvuoda.

Aktivitehtat

- Aktivitehtat leat mávssolaš oassi riikkaidgaskasaš turismabuktaga ja daid berre ovddidit.
- Geinnodagaid berre ovddidit nu, ahte dat bálvalit riikkaidgaskasaš turisma.

Olahahttivuohta

Girdinjohtolaga ja girdinstašuvdnavuojihemiid hálidit ovddidit sihke Avvila ja Girkonjargga girdinstašuvnnaide.

Joatkkadoaimmat

Dáid doaibmabidjoevttohusaid ulbmilin lea sihkkarastit, ahte projeavtta bohtosiid ja ávžžuhusaid sáhtá heivehit geavadii ja ahte Ohcejoga turisma ovdána mearrediđolaččat ja beaktilit, vai ásašuvvon ulbmilat ollašuvašedje.

Geinnodagaid ja Turistabáikkiid Ovddideapmi

Geinnodagaid ja turistabáikkiid ovddideapmi lea vealtameahtun turisma lasiheami várás. Dát sisttisdoallá sihke geasse- ja dálvegeinnodagaid plánema ja ollašuhhtima. Erenomážit dálveaktivitehtaid ja geinnodagaid ovddideapmi lea dehálaš, vai Ohcejohka sáhtá geasuhit eanet turistaid dálveáigge. Geinnodagaid ja turistabáikkiid ovddideamis bargojuvvo intensiivvalaččat ovttas Meahcceráđđehusain. Eanageavaheami mearrádusaid dahkamis gielddas leat váikkuhanvejolašvuodát. Geinnodagaide guoski njoahcudeaddji áššiid burgimiin sáhtá oazžut čielga ovdáneami áigái.

Vuovdaleami ja Vuovdima Beavttálmahttin

Guovllu oinnolašvuoda buorideapmi digitála kanálain lea dehálaš joatkkadoaimma. Dát sisttisdoallá earet eará turismaguovllu neahttasiidduid beaivádeami ja bajásdoalu, digitála vuovdaleami beavttálmahttima sihke mátkoordnejeaddjigalledemiid ja mediagalledemiid ordnema. Lassin lea dehálaš ovddidit guovllu oktasašvuovdaleami ja sihkkarastit, ahte Ohcejoga turismabuktagat leat oidnosis ja álkit gávdnomis sierra vuovdinkanálain.

Oktasašbarggu nannen

Viiddes oktasašbargu sierra čanusjoavkkuid gaskkas lea guovddáš sajis turisma ovddideamis. Dát sisttisdoallá oktasašbarggu nannema báikkálaš turismafitnodatdoalliid, gieldda, Meahcceráđđehusa, bálgosiid ja eará guovddáš doaibmiid gaskkas. Lassin oktasašbargu Norggain fállá vejolašvuodaid rájáid

rasttildeaddji turismapakeahtaid ovddideapmái ja oktasašvuovdaleapmái. Fierpmádatoktasašbargomálliin ja strategalaš doaibmabijuiguin fitnodagaid doaimea sáhtá lasihit, sihke dahkat doaimeas eanet gánnáhahtti ja geahppadabbo. Guovloorganisašuvnnaid (DMO, guovddášvárrendoaimeamat, DMC) rolla lea mearkkašahhti digitála vuovdaleami ovddideamis, girdinjohtolaga ja olahttivuođa buorideamis sihke turismasuorggi fitnodagaid fierpmáiduhhtimis.

Olahttivuođa Buorideapmi

Girdinjohtolaga ja joatkkaohtavuodaid joavkohtolaga ovddideapmi Avvila ja Girkonjargga girdinstašuvnnaide lea dehálaš turisma lasiheami dáfus. Dát sisttisdoallá girdingeinnodagaid ovddideami, joatkkaohtavuodaid joavkohtolaga ordnema girdinstašuvnnain Ohcejohkii sihke táksibálvalusaid fitnašuvvama buorideami. Johtinoktavuodaid buorideapmi geasuha eanet turistaid Ohcejohkii, go lea álkit boahiti guvlui. Girkonjargga girdinstašuvdna dahká vejolažžan girdima ja riekkematkiid ordnema márkahattiin. Girdingeinnodagaid gal ovddidit, muhto doaibma ii leat organiserejuvvon nu, ahte Ohcejohka beasašii váikkuhit čielgasit geinnodatovddideapmái.

Investeremiid Ovddideapmi

Turismainvesteremiid álggaheapmi ja EU-ruhtademiin ávkástallan gullet guovddáš joatkkadoaimmaide. Dát sisttisdoallá ođđa idjadansadjebáikkiid ja aktivitehtaid huksema sihke dálá turismafitnodagaid viiddideami. Investeremiid ovddideapmi buorida guovllu turismafálaldaga ja buktá ođđa bargosajiid. Turisma ulbmiliid meroštaladettiin lea erenomáš dehálaš váldit vuhtii, makkár fitnodatdoaibma Ohcejohkii oččoduvvo. Geavadis fitnodagat galget leat doarvái stuorrá, vai dat addet barggu.

Vásttolašvuoda Ovddideapmi

Vásttolaš turisma ovddideapmi lea dehálaš Ohcejoga turisma suvdilvuoda dáfus. Dát sisttisdoallá earet eará birasustitlaš geavadiid ovddideami, sámi kultuvrra ja árbevieruid gudnejahttima sihke turistaid diđolašvuoda lasiheami vásttolaš turismmas. Vásttolašvuoda ovddideapmi buorida Ohcejoga turisma beaggima ja bisuha gilvonávcca.

Turismaáššedovdi Bálkáheapmi

Okta dehálamos joatkkadoaimmain lea turismaáššedovdi bálkáheapmi Ohcejoga gildii. Turismaáššedovdi vástida turisma ovddideamis, koordineremis ja čuovvumis. Su bargguide gullá maid oktasašbarggu ovddideapmi sierra čanusjoavkkuid gaskkas sihke turisma vuovdaleami ja vuovdima beavttálmahttin. Turismaáššedovdi bálkáheapmi gildii buktá jottkolašvuoda ja ovddida turismadoaimmaid.

Máhtu Ovddideapmi

Gieldda hálddahuš- ja lánkačehppodaga lasiheapmi álkidahtášii turismii laktaseaddji njoahcudeaddji áššiid burgima. Turismasuorggi skuvlema ja máhtu ovddideapmi lea dehálaš turismafitnodagaid gilvonávcca buorideami dihte. Dát

sisttisdoallá earet eará turismafitnodatdoalliid ja bargiid máhtu ovddideami, sihke ođđa turismabuktagiid ja -bálvalusaid ovddideami. Máhtu ovddideapmi buorida turismafitnodagaid bálvalandási ja áššehasaid vásáhusaid.

Čuovvun ja Árvvoštallan

Turisma ovddideami jotkkolaš čuovvun ja árvvoštallan leat dehálaš áššit doaibmabijuid váikkuhanmuni árvvoštallama dáfus. Čuovvun ja árvvoštallan sisttisdoallá turisma mihttáriid ásaheami ja daid jeavddalaš čuovvuma. Mihttáriidda gullet earet eará idjademiid ovdáneapmi, riikkaidgaskasaš turisttaid ossodat, váldomárkaniid mearri ja ovdáneapmi, lanjaid haddedássi, idjadansadjekapasitehta mearri ja lassáneapmi, plánavuloš investeremiid mearri, idjadansadjekapasitehta mearri vuovdinkanálain, aktivitehtafitnodagaid ja buktagiid mearri sihke turismaboađuidda ovdáneapmi.

Čoahkkáigeassu

Ohcejoga turisma lea čielgasit maŋabealde eará Lappi turisma ektui, muhto guovllus leat mearkkašahtti ovdánavjolašvuođat ja geavatkeahtes potentiála, mainna sáhtta ovddidit turisma suvdilit. Dálá dillái leat mihtilmasat vuollegis idjadanmearit, vuollegis riikkaidgaskasašvuođadássi ja geasseturismii vuojulduvvan. Dálveturisma lea guovllus uhcán, ja dovddusvuohta riikkaidgaskasaččat lea heajos dásis.

Turisma ovdáneami stuorámuš vejolašvuođat leat birrajagi doaimma buorideamis, eandalit dálveturisma oasil. Ohcejoga lunddolaš nanusvuođat, nugo áidnalunddot árttalaš luondu, eallinfámolaš sámekultuvra, meahcceguovllut ja guovssahasat, láhčat vuođu suvdilis ovdáneapmái, erenomážit riikkaidgaskasaš márkaniin. Oktasašbargu Norggain, idjadansadjekapasitehta beavttálmahttin ja ođđa dálveaktivitehtaid ovddideapmi leat ovdáneami guovddáš elemeanttat. Jos dálá idjadansadjekapasitehtain ávkkástallošii beaktilabbot ja buoriduvvošii riikkaidgaskasaš oinnolašvuohta, de Ohcejohka sáhtášii juo dainna lasihit njealjegeardásažžan idjademiid meari, ja olahit ekonomalaččat buoret turismamáile. Suvdilis ovdáneami deattuheapmi ja riikkaidgaskasaš oktasabargu leat guovddáš sajis Ohcejoga turismastrategiija lihkestuvvamis.